

Een näwligen Dag in Grimmen

De Autoren von`n „Bund Niederdeutscher Autoren e.V.“ nämlich Lars Engelbrecht, Norbert Schröder, Bernd Lubs un miene Wenigkeit, Uwe Schmidt, harren an`n 28. Aprilmaand in de Grundschool „Friedrich Wilhelm Wander“, Grimmen, ehren Plattdüütschen Upträäd: An`n fröhen Morgen luerten nägenundörtig niegelige Schölers un dree Lihriers up dissen besünneren Dag. Buten wier dat bannig kolt un näwelig, oewer in de Turnhall, wur dat Programm tiedig los güng, hemm`s angenehm inböt`t!

De Musiker Lars Engelbrecht harr sick goot insungen & inspäält; sien ierstes Leed „Lütt Matten, de Haas“ keem bie de jungschen Vörpommern un ehr` Lihriers oewertügend an! Lars hett de Kinnings mit sienen Songs richtig goot miträten, de Stimmung wier prächtig. Man kann seggen, de Dag füng uprägend an! Dunn müßten sick de anner dree Maten kort vörstellen un de Schölers würden in vier Gruppen updeelt. Nah de Paus hebben dree Plattschnackers un een Lihrerin denn in de Klassenrüm ehr sülwst schräben Vertellers vörläst. De Lihrerin Fruu Sonnenberg hett denn een Stück von Norbert „Plüschmoors“ vörläst, Norbert sien „Vagelwunner“ un Uwe „Draculas sößhunnertster Geburtsdag in Weimar“ - dee wier halw Platt- un halw Nedderdüütsch schräben! Uns` Chef Bernd hett sienen Text „Up`n Wochenmarkt“ vör sienen teihn Schölers souverän vödragen.

De plattunkunnigen Schölers süllen hinnerher vertellen, wat se dorvon verstahn hebben. Un nich nur dit, nee se süllen dat denn ok nahspäalen. Se hemm` sick bannig väl Mäuh dorbie gäben. Männigein von de lütten Schauspäälers wier richtig enthusiastisch bie de Saak! Nahdem se allens goot prööwt hebben, güng`t wedder trügg in de Turnhall. Dunnerlüchting, vier Upträäd in vier verscheedenen Variationen, bannig väl Freud bie Jung un Oll in diss ehrwürdigen School! Up jeden Fall süll an diss positiven Beläwnis anknüppt warden, dat dat nich de letzt` Plattveranstaltung von`n BNA in de „Friedrich Wilhelm Wander“ School bliwwt!

Uwe Schmidt, Niegenbramborg, in`n Aprilmaand 2022